

Colossia Logot Paul He Likha Chithi

Salam Kotha

¹ Paul*, Isor laga itcha dwara Khrista Jisu laga ekjon apostle, aru Timothy amikhan laga bhai, ² pora Colossae nogor te thaka biswasi khan aru Khrista te biswasi bhai khan logot likhi ase. Apuni khan logote anugrah aru Baba Isor aru Probhu Jisu Khrista laga shanti thaki bole dibo.

Dhanyavad Aru Prathana

³ Amikhan Isor ke dhanyavad di ase, Probhu Jisu Khrista laga Baba Isor, aru amikhan hodai apuni khan nimite prathana kori ase. ⁴ Apuni khan Jisu Khrista te biswas kora amikhan huni loise aru Tai nimite alag rakhikena thaka manu khan nimite apuni khan laga morom thaka sob jani loise. ⁵ Apuni logote etu morom ase kelemane sorgote apuni nimite asha rakhi kene ase, ⁶ kun to apuni khan logote ahise. Etu susamachar pora bisi phul ulaikene prithibi te aru bhi dangor hoi thaka nisena, apuni khan majote bhi etu kotha kaam kori ase, juntu din pora apuni khan hunise aru Isor laga anugrah laga kotha hosa te sikhise. ⁷ Etu susamachar kotha apuni khan Epaphras pora sikhi bole parise, morom laga noukar, amikhan laga bodli

* **1:1** 1.1 Paul he etu chithi likhise aru Timothy to khali Paul logot milaikene salam jonai diya he ase.

te Khrista laga biswasi noukar. ⁸ Epaphras pora apuni khan Atma te morom thaka to amikhan ke janibole dise.

⁹ Etu morom thaka nimate, jitia pora etu hunise amikhan apuni khan nimate prathana kori bole rukhanai. Apuni khan ke Tai laga gyaan pora atma laga kotha khan bujhi bole paribole nimate mangi thakise. ¹⁰ Amikhan prathana kori ase apuni khan Probhu ke khushi kori kene bhal rasta te berai kene jabo aru sob kaam mon dikene kori thakibo. Amikhan prathana kori ase apuni khan sob phol ulabo aru Isor laga gyaan te aru bhi bisi dangor hoi thakibo. ¹¹ Amikhan prathana kore apuni khan sob kaam khan kori bole nimate takot pabo Tai laga mohima aru takot pora aru sob kaam te nomro aru khushi pora cholai kene loijabo. ¹² Amikhan prathana kori ase apuni khan Baba Isor ke dhanyavad dibo, kun pora apnikhan ke puhor laga pobitro manu hoi kene Tai laga rajyote thaki bole nimate jaga dise. ¹³ Isor he amikhan ke andhera laga rajyo pora bachai loise Tai sob pora morom kora chokra laga rajyote ani loise, ¹⁴ aru Tai pora he udhar pai, aru sob paap pora maph kori diye.

Khrista He Jinis Sob Uporte Ase

¹⁵ Khrista to nadikha Isor laga protima ase, shristi majote prothom jonom luwa to ase. ¹⁶ Tai pora he sob jinis khan ke bonaise, sorgote aru prithibi te thaka, dikha aru nadikha jinis khan. Singhason aru rajyo cholawta aru sorkar khan aru adhikari khan, sob to Tai pora he bonaise aru Tai nimate he bonaise. ¹⁷ Tai nijor sob jinis

age te ase, aru Tai logote he sob jinis eke logote dhori kene ase†. ¹⁸ Khrista he gaw te matha ase, girja laga matha ase. Tai he shuru ase aru mora pora prothom jonom huwa ase, etu nimite Tai he sob jinis te age jagate ase. ¹⁹ Keleman Tai logote Isor laga itcha bhorta thaka to Isor khushi paise, ²⁰ aru Putro te Tai nijor logote sob jinis ke milai loise. Tai Cross te bahai diya khun pora Isor shanti bonai dise. Tai dwara, Isor pora sob milai dise, etu prithibi aru sorgote thaka sob jinis ke. ²¹ Ekta homoi te, apuni bhi Isor usorte alag manu thakise aru bhabona aru biya kaam pora Tai laga dushman thakise. ²² Kintu etiya Tai nijor gaw te mora nimite apuni logote milai loise. Tai apnikhan ke Isor usorte pobitro aru sapha pora dibole nimite korise, ²³ etu karone apuni biswas te thik choli kene, ki susamachar laga asha apnikhan pora hunise ta te nahili kene thik pora khara koribi. Etu susamachar ke sorgo nichete thaka sob manu logot prochar kori ase. Etu susamachar nimite moi, Paul, ekjon noukar hoi jaise.

Mondoli Te Paul Laga Porisorja

²⁴ Etiya moi apuni khan karone dukh kori thaka nimite khushi pai ase, aru moi laga gaw mangso te ki komti ase aru Khrista pora dukh pa nisena etu Tai laga gaw nimite kori ase, kun to girja ase. ²⁵ Moi etu girja laga ekjon noukar ase, Isor pora moike etu jimedari apuni khan uporte diya nisena, Isor laga kotha to pura kori bole nimite. ²⁶ Etu asurit kotha khan poila homoi pora

† **1:17** 1.17 Rev. 1:8

manu khan nimite lukai kene rakhise. Kintu etiya kun Taike biswas kore taikhan ke dikhai dise. ²⁷ Isor pora Tai laga sob mohima laga dhun juntu laga hosa lukai kene thakise, etiya to etu Porjati manu khan ke jonai dibole mon ase. Etu ase Khrista, jun apuni khan logote ase, mohima laga asha. ²⁸ Etu Tai ase kun nimite amikhan prochar kori ase. Amikhan sob manu ke koi ase, aru amikhan sob manu ke gyaan pora sikhai di ase, etu pora sob manu khan ke Khrista laga usorte pura kori kene loi anibole paribo. ²⁹ Etu nimite moi kaam kori ase aru Tai laga takot loi kene thaki ase juntu takot moi logote kaam kori ase.

2

¹ Moi kiman dukh korise apuni khan nimite etu janibole dibo karone mon ase, aru Laodicea sheher te thaka khan, aru kun manu etiya tak moi laga chehera dikha nai. ² Moi taikhan laga mon dangor kori dibole nimite kaam kore aru morom pora eke logote ani kene sob gyaan laga dhun pora bhorta kori dibole nimite, Isor laga hosa kotha lukai kene rakhi thaka khan bujhi bole nimite, juntu Khrista ase. ³ Khrista logote he sob gyaan aru buddhi laga dhun khan lukai kene ase. ⁴ Moi apuni khan ke etu koidi ase kun pora bhi phusla kotha kori kene apuni khan ke thogai nadibo nimite. ⁵ Moi apuni khan logote gaw pora nathakile bhi, moi apuni khan logote atma te ase. Moi apuni khan laga takot aru Khrista uporte biswas aru bhal kaam khan kori thaka saikene khushi kori ase.

Khrista te Jinda Ase

⁶ Etu nimate, apuni Probhu Jisu Khrista ke luwa nisena, Tai logote bera bhi. ⁷ Gash laga shikor thaka nisena nijorke Tai logote bonai lobi, aru apuni ke sikhai diya* nisena hodai biswas te thakibi, aru dhanyavad di thakibi.

⁸ Sabi kun manu pora bhi apuni ke misa laga kotha khan koi kene dhori rakhibole nadibi, manu khan laga niyom hisab te, aru etu prithibi laga saman khan te khushi paikene, aru Khrista ke khushi nakori kene prithibi laga itcha te najabi. ⁹ Kelemanee Khrista pora he Isor laga ki itcha ase eitu khan pura manu khan logote thaki bole diye. ¹⁰ Apuni khan Tai logote bhorta hoi jaise, kun etu sob takot aru adhikar laga matha ase. ¹¹ Tai pora apuni ke bhi sunnot kori dise aru gaw mangso laga sunnot nohoi kintu Jisu Khrista laga khun pora sunnot kori dise. ¹² Tai logote baptizma pora apuni ke kobor te dise, biswas aru Isor laga takot pora Tai apuni ke jinda kori dise, kun he Taike mora pora jinda kori dise. ¹³ Jitia apuni khan paap aru gaw mangso laga sunnot pora mori kene thakise, Tai logote apuni khan ke jinda kori dise aru amikhan laga kiman paap thakise, etu sob maph kori dise. ¹⁴ Amikhan laga uporte baki lagai kene thaka khan sob Isor pora tirai dise, kun to amikhan uporte hali disele. Taike Cross te gojal mara pora etu baki hatai dise. ¹⁵ Khrista pora taikhan laga takot aru adhikar khan ke komjur koridi kene

* **2:7** 2.7 Yate hikai diya to Epaphras ase, v. 17.

manu khan laga usorte dikhai dise, Cross uporte mori kene taikhan uporte jiti loise.

Kun Pora Bi Ninda Koribo Nadibi

¹⁶ Etu nimite, apuni kha luwa kora to bisar kori bole nadibi, aru notun chand ula homoi te kha luwa kora khan manu ke bisar kori bole nadibi, aru Bisram din bhi bisar kori bole nadibi.

¹⁷ Eitu khan sob to ahibole thaka laga chaya nisina he ase, kintu asol laga kotha to Khrista he ase. ¹⁸ Kun manu dhorjo lobe mon ase aru sorgodoth khan ke aradhana kore, taikhan pora thogai kene tumikhan laga uphar harabo nadibi. Etu nisena manu to tai ki dikhise etu pora nijor mangso bhabona te bisi phutani hoijai. ¹⁹ Tai matha to dhori kene nathake. Etu matha pora he pura gaw laga kaam khan eke logote dhori kene rakhe; etu Isor pora diya pora he dangor hoi.

²⁰ Jodi apuni Khrista logote etu prithibi laga sob jinis khan chari dise, titia hoile aru bhi etu prithibi laga itcha te thaka nisena kele thaki ase:

²¹ Apuni nadhuri bhi, aru khai nasabi, aru na chubi!†” ²² Eitu khan sob to harai jai ase, manu khan pora kowa aru sikhai diya nisena. ²³ Eitu khan niyom to nijor laga gyaan pora bonai diya dhorem aru misa pora nomro dikhai diya he ase. Kintu taikhan laga gaw mangso laga kaam khan to eku daam nai.

3

Nijor Bi Notun Hobi

† 2:21 2.21 1 Tim. 4:3

¹ Jodi Isor pora apuni ke Khrista logote uthai dise, titia hoile apuni to upor laga jinis ke he bisaribi, kun jagate Khrista to Isor laga dyna hathte bohi ase. ² Prithibi laga jinis khan nohoi, kintu uporte thaka jinis khan ke bhabona koribi. ³ Kelemanee apuni mori jaise, aru apuni laga jibon to Isor te Khrista dwara lukai kene ase. ⁴ Jitia Khrista wapas ahibo, jun apuni laga jibon ase, titia apuni bhi Tai laga mohima te ahibo.

⁵ Etu nimite prithibi te thaka kaam khan sob morai dibi- bebichari, sapha nathaka, gaw mangso itcha, biya laga itcha, aru lalchi kora, kuntu to murti puja kora nisina he ase. ⁶ Etu kaam khan nimite Isor laga khong to ahi ase. ⁷ Ekta homoi te apuni khan etu kaam khan kori kene jinda thakise. ⁸ Kintu etiya apuni khan sob purana kaam khan chari dibole lagegusa, khong, biya bhabona, sorom khilai diya, aru apuni laga mukh pora biya kotha ula khan. ⁹ Ekjon-ekjon logote misa kotha nokoribi, kelemanee apuni khan logote purana manu aru purana kaam kori thaka khan sob ulaikene phelai dise*, ¹⁰ aru kun pora apuni khan ke notun manu bonai dise Tai laga gyaan pora notun hoi jaise. ¹¹ Yate kun bhi Yunani aru Yehudi nai, sunnot kora aru sunnot nakora nai, dusra jat aru desh laga manu nai, ta te Scythia laga manu nai, noukar aru ajad thaka manu nai, kintu Khrista he sob ase, aru sob te Tai he ase.

¹² Etu nimite, Isor pora basi luwa manu nisena, pobitro aru morom thaka khan, apnikhan daya,

* **3:9** 3.9 Rom. 12:2; 2 Cor. 4:16; Tit. 3:5.

morom, nomro aru norom aru dhorjo eitu khan pindhi lobi. ¹³ Ekjon-ekjon logote nomro aru morom kori kene thakibi. Jodi kunba manu dusra laga bhirodh kore, Probhu pora apuni ke maph kori diya nisena, taikhan ke bhi maph kori dibi. ¹⁴ Etu sob kotha khan pora bhi, morom thakibi, etu pora he sob to bhal bonai dibo. ¹⁵ Khrista laga shanti apuni khan laga monte raj kori bole dibi. Etu shanti nimite apuni khan ke ekta gaw hoi kene matise. Aru dhanyavad dibole janibi. ¹⁶ Khrista laga kotha apuni khan logote bhorta hoi kene rakhi bhi. Atma laga gana kori kene ekjon-ekjon ke gyaan pora sikhai dibi. Apuni laga monte Isor ke dhanyavad dikene gana kori thakibi. ¹⁷ Apuni khan ki kore, kotha aru kaam pora, Probhu Jisu laga naam te he koribi. Tai nimite Baba Isor ke dhanyavad dibi.

Khristan Porial Laga Hukum

¹⁸ Maiki khan, nijor mota logote bhal pora thakibi, etu he Probhu usorte thik ase†. ¹⁹ Mota khan, nijor laga maiki ke morom koribi, aru taikhan logote mon tita kori kene nathakibi. ²⁰ Bacha khan, sob kotha te ama baba khan laga kotha mani kene thakibi, kelemane Probhu etu he khushi pai. ²¹ Baba khan, apuni laga bacha khan ke biya kotha na koribi, etu pora taikhan laga mon dukh kori bole nadibi. ²² Sewak kora khan, gaw pora ki pare etu loi kene apuni malik laga kotha mani kene thakibi, manu ki suku pora dikhi kene khushi pai etu pora nohoi, kintu bhal mon loi kene. Probhu ke bhoi koribi. ²³ Apuni

† **3:18** 3.18 Eph. 5:22.

ki kori ase, atma pora kaam koribi aru Probhu nimite koribi, manu khan nimite kora nisena na koribi. ²⁴ Apuni jane Probhu pora apuni waris hobole laga inam pabo. Etu Probhu Khrista ase kunke apuni khan sewa kori ase. ²⁵ Kun manu biya kaam khan kore tai biya kaam kora laga hisab te he sajai pabo, aru taike eku alag morom napabo‡.

4

¹ Malik khan, ki bhal aru hosa ase etu he noukar khan ke dibi. Apuni bhi jane sorgote ekjon malik ase*.

Janibole Kotha

² Prathana te mon dikena kori thakibi. Dhanyavad dikene hoshial thakibi†. ³ Mili kene amikhan nimite bhi prathana koribi, Tai laga kotha kobole nimite Isor pora dorja khuli dibole, Khrista laga hosa kotha khan kobole nimite. Etu nimite, moike bhi bandi kene ase‡. ⁴ Prathana koribi moi apuni khan ke sapha pora koi dibole nimite, moi kobole thaka kotha khan. ⁵ Bahar te thaka manu khan logote gyaan pora berabi, aru homoi to usor ase etu janibi§. ⁶ Apuni khan hodai morom pora he kotha koribi. Nimok hali kene mitha kori diya nisena hobole dibi, etu pora apuni khan manu logote ki kobole lage etu janibo.

Hekh Salam Kotha

‡ **3:25** 3.25 Acts 10:34; Rom. 2:11. * **4:1** 4.1 Lev. 25:43, 53.
 † **4:2** 4.2 Rom. 12:12; Eph. 6:18; Phi. 4:6; 1 The. 5:17 ‡ **4:3** 4.3
 § **4:5** 4.5 1 The. 4:12

⁷ Moi sob kotha khan bhabi thaka to, Tychicus pora apuni khan ke jonai dibo. Tai ekjon morom laga bhai ase, aru ekta biswasi noukar, aru Probhu nimite kaam kora manu ase. ⁸ Moi taikhan ke etu karone he pathaise, amikhan ki kori ase etu khan janibole nimite, aru tai apuni khan laga mon to dangor kori dibole nimite. ⁹ Moi taikhan ke Onesimus logote pathaise, ekta biswasi aru morom laga bhai, tai bhi apuni khan nisena he ase. Taikhan yate ki hoise etu sob apuni khan ke koi dibo.

¹⁰ Aristarchus, moi logote bondhi ghor te thaka ekjon sathi, apuni khan ke salam di ase, aru Mark bhi apuni khan ke salam di ase, Barnabas laga bhai (kun nimite apuni adesh paisele; jodi tai apuni khan logote ahe, taike bhal kori kene sabi), ¹¹ aru Jisu kunke Justus bhi mate. Taikhan to sunnot kori luwa biswasi jon khan ase aru ami logote Isor laga rajyo nimite kaam kori ase, aru taikhan pora moi laga mon ke aram di thake. ¹² Epaphras apuni khan ke salam di ase. Tai bhi apuni khan nisena ekjon Jisu Khrista laga noukar ase. Apuni khan Isor laga itcha te bhal pora khara thaki bole nimite tai prathana koridi thake. ¹³ Kelemaner moi tai laga gawahi di ase, tai apuni khan nimite mon dikene kaam kori ase, aru Laodicea aru Hierapolis sheher khan te thaka karone bhi. ¹⁴ Luke, kun bemaar bhal kora manu ase aru Demas, tai duijon pora apuni khan ke salam di ase. ¹⁵ Laodicea te bhai khan ke salam dibi, aru Nympha ke, aru tai laga ghor te thaka girja ke. ¹⁶ Jitia etu chithi apuni khan majot porhe, Laodicea laga girja te bhi porhi

kene hunai dibi, aru apuni khan bhi Laodicea pora patha chithi saikene porhibi. ¹⁷ Archippus ke kobi, “Probhu pora pa-a laga porisorja sai lobi, etu apuni pura kori bole lage.” ¹⁸ Etu salam moi nijor laga hath pora likhise- Paul. Moike luha pora bandhi kene thaka to yaad kori bhi. Isor laga anugraha apuni khan logote thaki bole dibo.

**Indian Standard Version (ISV) Nagamese
The New Testament in the Naga Pidgin language of
India: Indian Standard Version (ISV) Nagamese**

copyright © 2019 Bridge Connectivity Solutions

Language: Nagamiz (Naga Pidgin)

Contributor: Bridge Connectivity Solutions Pvt. Ltd.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-14

PDF generated using Haiola and XeLaTeX on 21 Feb 2024 from source files dated 23 Apr 2023

302d590c-b57a-5734-9dcb-8a22ed7685c4